

兵部則例



兵部則例

職方清吏司

海禁



一海外耕種之禁。康熙十一年題準。居住海島



民人。概令遷移內地。以防藏聚接濟姦匪之弊。有仍在此等海島築室居住耕種者。照違禁貨物出洋治罪。汛守官弁。照例分別議處。○雍正七年議準。臺灣係海外地方。防範更宜嚴密。南路北路一帶山口。生番熟番。分界勒石。界以外聽生番採捕。如民人越界墾地搭寮。抽藤吊鹿。

及私挾貨物擅出界外者。失察之該管官降一級調用。該上司罰俸一年。若有賄縱情弊。該管官革職計贓治罪。如三年之內民番相安無事。將該管官紀錄一次。社甲兵丁人等。該督撫酌加獎賞。○乾隆九年

諭外省武職各官。不許在任所置立產業。例有明禁。在內地且然。况海外民番交錯之地。武職置立莊田。墾種收利。縱無占奪民產之事。而家丁佃戶倚勢凌人。生事滋擾。勢所不免。朕聞臺灣地方。從前地廣人稀。土泉豐足。武職大員無不創立莊產。召

佃開墾。以爲己業。且有客民侵占番地。彼此爭競。遂投獻武職。因而踞爲己有者。亦有接受前官之產。相習以爲固然者。其中來歷總不分明。是以民番互控之案。絡繹不休。若非徹底清釐。終非寧輯番民之道。著該督撫將歷任武職大員創立莊產。逐一察覈。果無侵占番地。及與民番並無爭控之案者。無論本人子孫。及轉售他人。均令照舊管業。若有侵占民番地界之處。秉公清出。民產歸民。番地歸番。不許仍前朦溷。以啟爭端。此後臺灣武職大小各官。創立莊產。開墾草地。永行禁止。倘有托

名開墾者將本官交部嚴加議處地畝入官該管  
官通同容隱並行議處欽此

一海船製造之禁順治十二年題準海船除給  
有執照許令出洋外若官民人等擅造二桅以  
上大船將違禁貨物出洋販往番國並潛通海  
賊同謀結聚及爲嚮導劫掠良民或造成大船  
圖利賣與番國或將大船賃與出洋之人分取  
番人貨物者均交刑部分別治罪至單桅小船  
準民人領給執照於沿海近處捕魚取薪營汛  
官兵不許擾累○康熙四十二年議準出洋貿

易商船許用雙桅梁頭不得過一丈八尺如一  
丈八尺梁頭連兩披水溝統算有三丈者許用  
舵水八十人一丈六七尺梁頭連兩披水溝統  
算有二丈七八尺者許用舵水七十人一丈四  
五尺梁頭連兩披水溝統算有二丈五六尺者  
許用舵水六十人若舵水越數多帶或詭名頂  
替守口官弁盤察不實者降三級調用借端勒  
索者降二級調用受賄者革職計贓治罪若兵  
有需索情弊該管官照衙役犯贓例議處○又  
議準漁船梁頭不得過一丈舵水不得過二十

人取魚不許越出本省境界。欲造船者先報明地方官。取澳甲里族各長。并鄰右保結。方準成造。完日。地方官親驗。將船身烙號刊名。舵水人等。取具船戶保結。然後給照。照內將在船之人年貌籍貫。分晰填明。○四十六年議準。福建漁船。桅聽其用雙用單。各省漁船。止許單桅。欲出洋者。將十船編爲一甲。取具一船爲匪。餘船並坐連環保結。若船主在籍。而船出洋生事者。罪坐船主。○五十年議準。商漁船。給發執照。係州縣專責。如營官擅給執照者。降二級調用。倘借

執照爲匪。將擅給執照之營官革職。○五十九年議準。出洋商船。初造時。先報明海關監督。并地方官。該地方官確訪果係殷實良民。取具澳甲里族各長。并鄰右保結。方準成造。完日。地方官親驗。梁頭並無過限。舵水並無多帶。取具船戶不得租與匪人甘結。將船身烙號刊名。然後給照。照內將在船之人年貌籍貫。分晰填明。及船戶攬載開放時。海關監督將原報船身丈尺驗明。取具舵水連環互結。客商必帶有資本貨物。舵水必詢有家口來由。方許在船。監督驗明。

之後即將船身丈尺客商姓名人數載貨前往  
某處情由及開行日期填入船照○雍正元年  
題準出海商漁船自船頭起至鹿耳梁頭止大  
桅上截一半各照省分油飾江南用青油漆飾  
白色鈎字浙江用白油漆飾綠色鈎字福建用  
綠油漆飾紅色鈎字廣東用紅油漆飾青色鈎  
字船頭兩披刊刻某省某州縣某字某號字樣  
沿海汛口及巡哨官弁凡遇商漁船驗係照依  
各本省油飾刊刻字號者即係民船當即放行  
如無油飾刊刻字號即係匪船拘留究訊○三

年議準西洋人附居廣東澳門共有大小二十  
五船地方官編列號數刊刻印烙各給執照一  
紙將船戶舵水及商販夷人該管頭目姓名填  
注照內即以此二十五船爲定額不許增置若  
實係朽壞不堪修補呈明地方官察驗取具印  
甘各結申報督撫準其補造仍用原編字號○  
又覆準廣東漁船梁頭不得過五尺舵水不得  
過五人○九年議準商漁船篷上大書州縣船  
戶姓名每字大各徑尺藍布篷用石灰細麩以  
桐油調書箬篷白布篷用濃墨書黑油分抹字

上不許模糊縮小。○又奏準商漁船桅披照省分漆飾及篷上書姓名。原爲稽察姦匪。若官弁怠惰偷安。不稽察者。革職。兼轄統轄官不揭報者。降二級調用。不行題叅之總兵官。罰俸一年。提督。罰俸六月。○十七年議準。往販外洋商船。準用頭中插花。并所樹桅尖。其內洋商船及漁船。不許用頭中插花桅尖。如違例私用。守口官并不行察報者。罰俸一年。

一出入海洋之禁。康熙二十三年題準。海氛既靖。山東。江南。浙江。廣東各海口。除夾帶違禁貨

物。仍照例治罪外。商民人等有欲出洋貿易者。呈明地方官。登記姓名。取具保結。給發執照。將船身烙號刊名。令守口官弁察驗。準其出入貿易。○五十六年覆準。商船準在沿海省分及東洋貿易外。其南洋之呂宋。噶喇吧等處。不許前往。皆在南澳等地方稽察截住。令廣東水師各營盤緝。違者治罪。其外國夾板船。照舊準其貿易。地方官嚴加防範。不許生事。○又覆準。渡海人民。必由地方官給照。守口官弁察驗放行。若無照偷渡者。嚴行禁止。如有巡哨船。私帶偷渡

者將該管專轄官議處○六十一年議準商漁船被風飄至朝鮮係領有執照者該國王照例送回若匪類並無執照私自前往生事者許該國王緝拏照該國法審擬咨明禮部具題請旨行文該國王於彼處完結仍報部存案並究明由何處出口將失察守口官弁降四級調用該管上司降一級留任提鎮罰俸一年如守口官弁知情故縱者革職提問不揭報之該管上司降三級調用不題叅之提鎮降二級調用○雍正三年奉

旨○無照民人夾帶船內偷渡者發覺之日將該管督提

一并議處○五年覆準福建戶口殷繁閭閻生計不得不借貿易之盈餘佐耕耘之不足開洋既有益於百姓且防範嚴密復不致稍有疎虞南洋諸國準令福建商船前往貿易○又覆準廣東地狹民稠照福建之例準往南洋貿易○又議準山東邊海除外來商船各照彼省執照察驗外其登萊二府民人前往奉天貿易及奉天等處民人有赴山東貿易者入口出口該州縣均給執照將客商船戶姓名貨物往販地方一一

填注守口官弁挂號驗照放行。若並不稽察，或有勒索擾累者，照例議處。○六年議準出洋商船於出口之處，將執照呈守口官弁驗明挂號，填注出口月日，放行。造冊報明督撫，該督撫於每年四月內造冊報部。回時於入口處，守口官弁將照與船比對相符，報明督撫銷號。該督撫於每年九月內造冊報部。如出洋人回而船不回，大船出而小船回，及出口人多而進口人少者，該督撫嚴加訊究。果係番欠未清，俟來年六月間乘風駕回，其被風飄往別省者，船戶取

具彼處地方官印結，齎回呈驗。遭風覆溺者，若有餘存之人，及同行鄰船客商舵水等，即訊取確供保結。再加地方官印結詳報，均於入口冊內聲明報部，免其訊究。倘留番清欠之船來年仍不駕回，捏報遭風飄溺等弊，並無彼處地方官印結及餘存之人鄰船客商舵水甘結者，該督撫嚴察治罪。原出結地方官交部議處。○又議準商船在各省沿海貿易者，於出口之處將船照呈守口官弁驗明挂號，經過之處於要汛驗明挂號入口之處，由守口官弁驗明回權之

日仍從各原處覆驗掛號而回○七年覆準江  
南浙江商民準照福建商民往南洋貿易其前  
往南洋必經由福建所有商船姓名數目該督  
撫先期知會福建總督轉飭守口官弁察驗放  
行回權之日仍由福建總督知會江浙互相稽  
察○又議準福建商船直漁期欲出海取魚者  
赴地方官呈明換領漁照取具澳甲里族各長  
并鄰右保結同船連環互結準其入海取魚俟  
漁期過後將漁照繳銷仍換給商照該地方官  
將換給船照緣由彙報上司存案如過期不歸

即行察究永不許出海取魚○十二年議準商  
人置貨出洋必在本籍地方取結給照以防偷  
越及夾帶違禁貨物之弊其中有小本商人領  
照而往迨從外番回至內地到各處發賣貨物  
并別置貨物趕回因風信屆期又應放權不能  
奔回本籍地方請照在福建者準呈明廈防廳  
在廣東者呈明南海縣在浙江者呈明乍浦海  
防廳各取其行戶船戶保結給與執照前往該  
廳縣將給照緣由行知該商本籍地方官存案  
該商回權之日各赴請照衙門繳銷如該船舵

水客商有在番地交易未清及別項事故原給  
照衙門取具同行鄰船客商舵水甘結移行該  
商本籍地方官存案下期回日驗銷○又議準  
商船於出口之際舵水遇有事故該船戶就近  
招募取具保結由守口官弁批發執照準其頂  
補○又議準民人偷渡外洋該汛官弁拏獲十  
名以上者專管官紀錄一次兼轄官毋庸議叙  
兵各賞銀二兩二十名以上者專管官紀錄二  
次兼轄官紀錄一次兵各賞銀四兩三十名以  
上者專管官加一級兼轄官紀錄二次兵各賞

銀六兩四十名以上者專管官加二級兼轄官  
紀錄三次兵各賞銀八兩五十名以上者專管  
官以應升之官即用兼轄官加一級兵各賞銀  
十兩賞銀即於船戶名下追給倘不實力稽察  
致踈縱十名以上者專管官罰俸一年兼轄官  
免議兵各責二十板二十名以上者專管官降  
一級留任兼轄官罰俸六月兵各責三十板三  
十名以上者專管官降二級留任兼轄官罰俸  
一年兵各責四十板四十名以上者專管官降  
三級留任兼轄官降一級留任兵各責四十板

革糧五十名以上者專管官降一級調用兼轄  
官降二級留任兵革糧枷一月責四十板其降  
級留任之人如能拏獲別案偷渡按其所獲名  
數抵銷若三年內稽察嚴密汛內肅清該督撫  
提鎮題請開復○又議準洋船偷渡民人每在  
初出洋面之際福建海船挂驗出口之時該汛  
官弁押交大擔汛轉交浯嶼汛撥船押送東旋  
以外洋面俟其乘風放洋後方許回汛廣東海  
船挂驗出口之時該汛官弁押交虎門協撥船  
押送外洋洋面俟其乘風放洋後方許回汛浙

江乍浦海船出口即係大洋寧港海船由鄞縣  
盤察至蛟門即係大洋普陀海船由定海盤察  
至旗頭即係大洋毋庸撥船押送○乾隆元年  
奏準漁船出口入口守口官弁驗明船照準其  
出入如盤察不實及借端勒索者降二級調用  
受賄者革職○又議準沿海一應樵採及內河  
通海之各色小船均報明地方官取澳甲鄰右  
保結編烙船號姓名給照遇晚必停泊人家塘  
汛處所倘船被賊押坐出洋立即報官將船號  
姓名移知營汛緝究若租船與人必報明本處

澳甲出結報官存案其呈報行船遭風者驗明  
人夥有無落水受傷必有實據方準銷號其出  
口入口祇赴就近守口官弁挂號稽察不必預  
定處所日期或風信不齊進口愆期者取其結  
狀存案如盤察不實及借端勒索者照漁船例  
議處○三年覆準沿海樵採小船每船許帶食  
鍋一口所須斧斤每人許帶一把在船人數不  
得過十名均於照內注明出入察驗不得越數  
多帶及進口時故意闕少○四年議準內地民  
人出洋貿易違禁買回番仔人口守口官弁稽

察不力者照外國之人私自進口不報例降一  
級調用該管上司罰俸一年如知情故縱者革  
職賄縱者革職治罪○六年奏準拏獲偷渡民  
人隱匿不報者官革職兵責四十板革糧賄縱  
者官革職兵革糧均治罪○又奏準拏獲偷渡  
之人訊明從何處開船將該守口官弁照疎縱  
偷渡外洋例按人數分別議處拏獲者照拏獲  
偷渡外洋例按人數分別議叙若弁兵因公差  
委所乘船將無照之人偷載專管官知情者革  
職提問不知情者革職兼轄統轄官不揭報題

叅者均照不揭報劣員例議處○七年覆準商船在於內地沿海省分貿易者以二年爲限二年之後始歸者嗣後不許再出口往販外洋者以三年爲限逾限不歸者該商及舵水人等勒還原籍永遠不許出口其外洋停泊船察驗船照已閱多年者勒令入口交地方官訊究詳報○十一年奏準奉天南面均係海疆金復雄蓋等處地方與山東登萊兩府對峙商船不時來往私載民人勢不能免必須立法稽察凡帶有無照之人來奉天者商貨仍聽起運外其照上

無名之人察出遞解回籍船戶治以夾帶私人之罪不必遞解船亦免其入官○十三年議準民人偷渡兵在外洋拏獲者仍照例分別賞給如偷渡船尚在沿海口岸兵於本管界內拏獲原係分內之事無庸賞給若將別汛沿海口岸偷渡民人盤察擒獲者照外洋拏獲例減半賞給但不得因有賞銀將沿海口岸不應盤察之船借端需索滋擾○十九年議準康熙五十六年禁止商船不許出洋貿易其私行前往者皆違禁偷越之人是以定例不準回籍自雍正五

年洋禁既開。凡商船之在洋逾限未歸者。或因貨物未清。守候愆期。原與違禁偷越者不同。若竟不準回籍。情屬可憫。嗣後有實因貿易稽留在外。今願回籍。或本身已故。遺留妻妾子女。願回籍者。均準其附船回籍。令船戶出具保結。於進口時。報明該管官。令歸本籍安插。携回貨財。地方官不得藉端需索。至無賴之徒。原係偷渡番國。潛住多年。充當甲必丹。供番人役使。及本無貲本。流落番地。哄誘外洋婦女。娶室生子。迨至無以爲生。復圖就食內地。以肆招搖誘騙之

計者。仍照例嚴行稽察。該督撫隨時酌量辦理。○又議準。出洋貿易商船。皆挾貲求利。素非爲匪。且內地各有妻孥產業。原未肯輕棄家鄉。祇因海洋風信靡常。商欠取討匪易。又或疾病難歸。棲身番地。或在船充當舵水。遭風流落。凡此皆係欲歸不得。並非有意淹留。見在開洋貿易之民。源源不絕。而因事耽延者。亦頻年有之。從前出洋回籍。原無定限。迨後定以三年。倘稍逾限。即不得返歸故土。似非一體同仁之意。嗣後出洋貿易者。無論年分久近。概準回籍。若本身

已故遺留妻子女亦準回籍責成帶回之船戶。出具保結存案。仍令該督撫於沿海口岸地方出示明白。曉諭令其不必遲迴觀望。其携回貨財有不肖官役藉端擾累需索者。即嚴行叅處。

一貨物出洋之禁。康熙二十三年覆準。焰硝硫黃軍器樟板等物。違禁私載出洋。接濟姦匪者。照例治罪。該管汛口文武官弁盤察不實者。革職。知情賄縱者。革職提問。兼轄官降四級調用。統轄官降二級留任。提督降一級留任。○四十

七年覆準。出洋船所帶食米不得過五十石。如多帶出洋販賣者。照例治罪。將米入官。○五十六年覆準。出洋船按道里遠近人數多寡。停泊發貨日期。每人一日準帶食米一升。并帶餘米一升。以防風信阻滯。出口時守口官弁逐一驗明放行。不許借端需索。○又覆準。臺灣產米。不許私運出洋販賣。至漳泉廈門等處。米少價貴。有船從臺灣帶米至該處者。準其照時價糶賣。○六十一年覆準。外洋番國進貢。順帶貨物。願自出夫力。帶來京城貿易者。聽如欲在彼處買

易該督撫委廉能官監看貿易完日造冊報部如貢船到岸未曾報官盤驗先行售買及內地民人爲外國收買違禁貨物者均照例治罪至不係進貢之船有裝載貨物前來貿易者照例投行納稅聽其貿易回權之日不許收買違禁貨物○雍正三年議準附居廣東澳門之西洋人所有出洋商船每年出口時將照赴沿海該管營汛掛號守口官弁將船號人數姓名逐一驗明申報督撫存案如出口夾帶違禁貨物并將中國之人偷載出洋守口官弁徇情疎縱者

革職至入口之時亦將船號人數姓名逐一驗明申報督撫存案除頭目遇有事故由該國發來更換者準其更換外其無故前來者不許夾帶入口及容留居住若稽察不力將守口及地方該管各官照失察例議處○又覆準福建產米無多往販外番船酌定帶回米以資民食往暹羅者大船帶米三百石中船帶米二百石噶喇吧大船帶米二百五十石中船帶米二百石呂宋東埔寨馬辰柔柔四處大船各帶米二百石中船各帶米百石埭仔六坤安南宋居勝丁

家盧宿霧蘇祿七處中船各帶米百石於入口時將數目驗明若有多餘一并造報均聽照時價發賣如不足數若有偷漏情弊照接濟姦匪例治罪○又覆準外洋行走之船動經數月鐵釘油灰棕絲黃麻等物準酌量攜帶於照內填注數目以備察驗如有動用同船之人出具甘結存案倘有借端多帶者照例治罪○七年覆準出洋船食米若於酌定數目之外多帶售賣或實係接濟姦匪或止係圖利察出將米入官賣米之人分別治罪守口官弁隱諱不報者革

職如受賄故縱革職治罪○九年奉

旨鐵器不許出洋貨賣律有明禁乃聞粵東出產鐵鍋凡洋船貨賣向未禁止夷船出口每船所買鐵鍋少者百連至二三百連不等多者買至五百連并有至千連者每連約重二十斤不等五百連約重萬斤千連約重二萬斤計筭每年出洋之鐵為數甚多誠有關繫嗣後鐵鍋應照廢鐵之例一概嚴禁無論漢夷商船均不許貨賣出洋違者照捆載廢鐵出洋之例治罪官役通同徇縱亦照徇縱廢鐵例議處凡遇洋船出口仍交與海關監督一例稽察至於商船每日

煮食之鍋仍照舊置用官役不得借端勒索滋擾倘  
地方官弁視為具文奉行不加經朕訪聞或別經發  
覺定行從重議處各省洋船出口之處均令一體遵  
行永著為例○又覆準一切廢鐵除內地販賣聽從  
民便無庸禁止如有將廢鐵潛出邊境及海洋  
貨賣立即拏究照例治罪該管官知情故縱者  
革職受賄者革職提問○乾隆元年覆準米穀  
偷運出洋及在洋接濟姦匪該管文武官弁除  
通同受賄知情故縱仍照律治罪外如係失察  
偷運米百石以上穀二百石以上者降一級留

任米百石以下穀二百石以下者罰俸一年米  
不及十石穀不及二十石者罰俸六月○二年  
覆準洋船換買錢若數目過多恐有販銷之弊  
令守口官弁實力稽察如有姦商圖利多載錢  
出洋者即拏治罪○十三年覆準雜糧麥豆偷  
運出洋除接濟姦匪者與米一例科斷外若止  
繫圖利計所運數目照二穀一米之例減等問  
擬至官弁受賄故縱及失察處分仍照米穀例  
行○十四年覆準紅黃銅器及銅私販出洋貨  
賣者分別首從治罪銅及銅器并船均入官守

口官弁知情故縱者革職受賄者革職提問失  
察者降一級調用

一軍器出洋之禁雍正六年覆準商船漁船不  
許攜帶槍礮器械至往販東洋南洋之大船原  
與近洋不同準其攜帶鳥槍不得過八腰刀不  
得過十弓箭不得過十副火藥不得過二十斤  
洋商投行買貨即同牙人將應帶軍器數目呈  
明海關給票照數製造鑿書姓名號數完日報  
官點驗填入照內守口官弁驗明放行回日如  
有短少即行訊究果係遺失取通船甘結存案

○八年覆準往販東洋南洋之大船準攜帶礮  
位每船不得過二位火藥不得過三十斤造礮  
時呈明地方官給與印票赴官局製造完日地  
方官親驗鑿鑿某縣某人姓名某年月日製造  
字樣仍於照內注明所帶之礮輕重大小以備  
海關及守口官弁察驗回日繳官貯庫開船再  
行請領倘本船遭風礮致沉失即於所在地方  
官報明免其治罪如其船無恙妄稱沉失者即  
行訊究若商船內買有外番紅銅礮許其帶回  
交地方官給與時價以充鼓鑄之用

一沿海弁兵之禁。雍正九年議準。商船在洋遭風落淺。巡哨汛守兵丁。不爲救護。轉搶奪財物。拆毀其船。以致商人斃命。或未致斃命。皆照例分別首從治罪。在船該管官弁。如同謀搶奪。雖兵丁爲首。該員亦照爲首例治罪。雖不同謀。但分贓者。照爲從例治罪。實係不能約束。並無通同分肥情弊者。革職。若遭風被淹。商人救援得生。兵因而撈取財物者。坐贓治罪。該管官鈐束不嚴。降二級留任。其商人淹斃在先。見係飄沒無主船貨。因而撈搶入已。不報者。亦坐贓治罪。

如見船覆溺。因不許搶奪。撈取財物。阻撓不救。以致商人斃命者。阻救之人。係官革職。兵革糧均分別首從治罪。至沿海汛口弁兵。極力救護。遭風人船。不私取絲毫財物者。該管官據實申報。督撫提鎮記功。遇有水師千把總員闕。拔補其守備以上各官。救護船二次者。紀錄一次。倘弁兵內因救護人船。或受傷被溺。該督撫提鎮保題。照因公差委弁兵受傷被溺例。給與卹典。○十年議準。臺灣海外重地。文武官員。必互相稽察。若有貪酷乖張。以致起釁生事者。如係武

職游守以下等官。將不揭報之副將叅將降三級調用。不題叅之總兵官降二級調用。不告知督撫之文職降一級留任。如係文職同知以下等官。將不揭報之道府降三級調用。不告知督撫之武職降一級留任。○乾隆五年議準沿海守口官弁察驗挂號之處不許借端需索故意留難。如有此等情弊即行題叅。將守口官弁降二級調用。督撫提鎮失於覺察者罰俸一年。若兵有需索留難將兵計贓治罪守口官弁照失察衙役犯贓例議處。



